

Ujumbe wa Malaika wa Tatu

Lakini hekima itokayo juu, kwanza ni safi, tena ni ya amani, ya upole, tayari kusikiliza maneno ya watu, imejaa rebema na matunda mema, haina fitina, haina unafiki—Yakobo 3:17.

Ujumbe wa malaika wa tatu ni wa uhakika mkamilifu. Unaweza kuwa na uhakika juu ya kweli kuu na ziadilishazo zinazohusiana na ujumbe huu. Fanya kazi kwa weledi ili kutia shime umoja wa kiimani na wa kimaamuzi, ili wote waweze kuunganishwa katika vifungo vya ushirika na upendo wa Kikristo....

“Lakini hekima itokayo juu, kwanza ni safi, tena ni ya amani, ya upole, tayari kusikiliza maneno ya watu, imejaa rehema na matunda mema, haina fitina, haina unafiki. Na tunda la haki hupandwa katika amani na wale wafanyao amani” (Yakobo 3:17, 18).

Kanuni iliyowekwa hapa ni matokeo ya asili ya dini ya Kikristo. Hasa wale wanaohusika katika kutangaza ujumbe mzito wa mwisho kwa ulimwengu unaokufa watafanya hima kutimiza andiko hili. Ingawaje wanakuwa na hulka na tabia tofauti, watakubaliana katika mambo yote ya imani ya kidini. Watazungumza lugha moja, watakubaliana katika kila jambo na watakuwa wamoja katika Kristo Yesu....

Hakuna hata mmoja apaswaye kufikiri kwamba maamuzi yake ndiyo sahihi, mawazo yake hayawezi kupingwa na kwamba anaweza kufuata njia yake mwenyewe, bila kujali maoni ya wengine ambao wameungana katika kazi. Tunapofikiri kuwa tunajua yote ambayo tunapaswa kuyajua, tumekuwa katika nafasi ambayo Mungu hiawezi kututumia. Ujumbe wa malaika wa tatu si ujumbe mdogo. Ni wa ulimwengu wote; na tunapaswa kuungana, kadiri iwezekanavyo, katika namna ya kuuwasilisha kwa ulimwengu.

Mwanadamu anaweza kukosea; lakini ujumbe ni wa uhakika. Pamoja na hayo yote unapaswa kuwa na uwiano; ni kitovu kikuu, ambapo mioyo yote inapaswa kuunganishwa. Tunaweza tukapata hoja ambazo hazina madhara na kutafuta kuzitumia; lakini hatuwezi kuimarika kwa kufanya hivyo. Ujumbe unapaswa kuwaandaa watu ili kusimama katika siku kuu ya mwisho na kuunganishwa huko juu mbinguni. Hakuna ambaye anapaswa kufikiri kwamba haina umuhimu wowote maalum ikiwa wameungana na ndugu zao au si; kwa kuwa wale ambao hawajifunzi kuishi kwa mapatano hapa hawataungana mbinguni....

Wengine wana uhuru wa asili ambao unawaongoza kufikiria zaidi juu ya uamuzi wao wenyewe kuliko ule wa ndugu zao. Kwa kufanya hivyo wanajiweka wenyewe mahali ambapo wanashindwa kupata maarifa zaidi ambayo Mungu alitaka wawe nayo.... Mafundisho na mipango inapaswa kulinganishwa na sheria na ushuhuda. Kamwe hatupaswi kujiona kuwa huru sana kushindwa kujifunza kwa wengine (*Historical Sketches*, 122-125).

Yesu Kristo aliye kiini kikuu cha mvuto, hapaswi kuachwa nje ya ujumbe wa malaika wa tatu.... Daima mwenye dhambi anapaswa kutazama kuelekea Kalvari; na kwa imani sahili ya mtoto mdogo, sharti atulie katika ustahili wa Kristo, akiukubali haki Yake na kuamini katika huruma Yake (*Evangelism*, 184, 185).